

## 61.—HE TANGI MO TE HEUHEU TUKINO I. ARA TE HEUHEU HEREA.

*Na TE HEUHEU TUKINO II. (Ngati-Tuwharetoa.)*

*Na Te Taite Te Tomo i whakamarama.*

Kua whakamaramatia i te waiata nama 60 te matenga o Te Heuheu i te horo i te tau 1846. E ki ana a Werihe Te Tuiri nana tenei tangi, mo tona matua, mo Te Heuheu Tukino (I.), e kiia nei Ko Te Heuheu Herea.

Ko te Upoko-o-Waipare he kohatu kei te moana o Taupo, kei waho o Te Rapa e tu ana; e kiia ana he taniwha. Ka kitea atu ka rere mai he kawau, ka noho i runga i taua toka; a ka tau tetahi, ka tau tetahi. Ka mohiotia he tohu mate.

(Ref: M. 124, S2. 60, M.M. 209.)

Tataka<sup>1</sup> kau ana nga manu o te ata, ka riro ko koe ra!

Haere, e Pa, i te hahatanga o Pipiri.<sup>2</sup>

E kore au e mihi, mei riro ana koe

I te puta tu ata, i whakarakea i te awatea.

Kawau<sup>3</sup> aroarotea tena ka tu, ka pae kei o taua aroaro:

Tiria<sup>4</sup> atu ra ki te aroaro o te atua,

I whakakateatia<sup>5</sup> i te ahiahi.

Taku manu noho matarae i whangaia ki te hau;

Aku ika<sup>6</sup> huirua tena ka tiu kei te paenga i o riri;

Taku komako whakahau no nga rake<sup>8</sup> manawa o te  
tahatika ki Pungarehu!<sup>9</sup>

Ka whangaia koe ki runga i te ahurewa,

Ka kai Uenuku<sup>10</sup>, e ra!

Komako<sup>11</sup> noa ana i tau po ko koe anake,

Te au ko te moe, e tokona<sup>12</sup> ake ana ki runga ra;

Na te mamae<sup>13</sup> ra ka huri ronaki.

Koe<sup>14</sup> ika pawhara na te atua<sup>15</sup> ki runga i te tiepa<sup>16</sup>.

Whatiia mai ra titapu<sup>17</sup> maroro,

Ka tokia to kiri e te anu<sup>18</sup> kopata.

Ka pa ia nei he wehenga tau koe;

Te wehe i te matua no hea e hoki mai ki ahau.

Te matua i te whare me rauhi mai e te ringa.

Te matua i te waka me whakatangi ki te waihoe;

Me uta ki te patu, me uta ki te tao;

Nga mahi ra, e, i whakararawetia,<sup>19</sup> ka rewa kei runga

I te apaapatu<sup>20</sup> kei o tuakana;

I te waka e tau ana i te nui 'Ati-Tu,<sup>21</sup>

I te rahi 'Ati-Rangi,<sup>22</sup> mana e hoatu ki te mata<sup>23</sup> uraura.

Maku e whakamau nga tai-toru<sup>24</sup> atea o te wai.

E Pa ma! Tirohia mai ko au anake tenei;

Ka riro te mumu, ka riro te awaha;

Ka tere te parata, ka maunu te ika i tana rua;

Watea kau ana ko te turanga kau o Rehua.

Taku kaka haetara ki te iwi ra ia.

Takoto ana mai te marino i te pae ki a koe.

Ka eke i o he<sup>25</sup>, ka tau ki raro, e, ra!